

**Pemodenan Sektor Pertanian, R&D Bantu Rancakkan Ekonomi Petani – Najib Bernama**  
**01 Julai, 2012**

KUALA LUMPUR, 1 Julai (Bernama) -- Di samping Institut Penyelidikan dan Pembangunan Pertanian Malaysia (MARDI), pihak lain turut dialu-alukan untuk membantu meningkatkan pengeluaran mangga harum manis di Perlis, kata Perdana Menteri Datuk Seri Najib Tun Razak.

Beliau berkata kerajaan sudah menetapkan untuk memodenkan sektor pertanian namun ia harus bermula dengan bidang penyelidikan dan pembangunan (R&D) agar dapat membantu merancakkan ekonomi para petani.

"Di sini saya lihat peranan MARDI amat penting. Mungkin pihak-pihak lain boleh bantu supaya kaedah dalam harum manis dan tanaman lain boleh kita ubah suai," katanya ketika ditemu bual dalam program 'Suara Kami 2012' yang disiarkan di Astro Awani Ahad malam.

Beliau menjawab soalan seorang penonton yang merupakan usahawan mangga harum manis di Perlis yang bercita-cita meningkatkan pengeluaran buah itu kepada tiga kali setahun berbanding hanya sekali pada masa ini.

Najib turut berkongsi pengalaman beliau dan isteri Datin Seri Rosmah Mansor yang menyerahkan tapak seluas 1.6 hektar di kediaman mereka di Seri Perdana, Putrajaya untuk tanaman tembikai wangi.

"Sebuah syarikat telah menampung 0.8 hektar tanah lagi dan mereka tanam tembikai wangi menggunakan sistem autopot. Tahun lepas keuntungan bersih lebih RM600,000 dan tahun ini RM550,000. Tahun lepas keuntungan ini disumbangkan kepada persatuan ibu-ibu tunggal dan tahun ini kepada persatuan autistik.

"Apa yang saya nak kata di sini, kaedah teknologi pertanian moden boleh beri hasil yang besar," katanya.

Selain pertanian, Najib berkata kerajaan juga berhasrat untuk melihat para nelayan menjadi lebih maju, menjana pendapatan yang lebih tinggi serta berpuas hati dengan kerjaya mereka.

Di samping menggalakkan mereka menggunakan teknologi moden, misalnya GPS (Sistem Penentuan kedudukan Global) dan bot yang besar dengan peralatan canggih untuk mencari lubang-lubuk ikan, Perdana Menteri mencadangkan agar sumber tangkapan turut ditambah.

"Kita perlu lihat usaha untuk tambah lagi jumlah ikan. Mungkin kita boleh buat tukun tiruan untuk dijadikan tempat pembiakan. Sebab kalau kita tambah pendapatan tapi tak tambah punca, ia akan merosot," katanya.

Sementara itu, Najib berkata Malaysia memerlukan lebih banyak pemodal usahaniaga dan pelabur tidak formal agar hasrat mewujudkan 'My Creative Venture Capital' dapat direalisasikan.

Katanya ia penting agar negara boleh mempunyai sebuah ekosistem yang bersedia menampung proses inovasi secara besar-besaran.

"Kita perlu sekumpulan orang dalam masyarakat yang menilai sesuatu bukan berdasarkan aset dan pencapaian tetapi berasaskan idea yang sudah dipatenkan sebagai IP (Harta Intelek) dan boleh dikomersilkan. Ini cabaran sebab orang kita biasa buat cara konvensional," katanya.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=677185>